



**Programa di Accion di MEP
pa Gobernacion
2006 – 2010**



**HUNTO NOS SI POR
MAS PA BO**

Contenido

	<u>pagina</u>
Introduccion	3
Maneho General	4
Maneho Financiero-Economico	5
Maneho di Turismo y Transporte	9
Maneho Social	12
Maneho di Salubridad Publico	13
Maneho di Enseñansa	14
Maneho di Husticia	16
Maneho di Labor	18
Maneho di Deporte	19
Maneho Cultural	20
Maneho Infrastructural	21
Medio Ambiente	21
Epilogo	22

MEP, pa Aruba sigui PROGRESA

Introduccion

Siglo 21 ta e era di globalisacion y un mundo sin frontera economico. Un era caminda structuranan economico y social, construi den siglo 20, ta bou presion. Globalisacion ta presenta retonan grandi pa tur pais y na mes momento ta crea oportunidadnan nobo pa pueblonan progresa y emancipa. Ta e reto pa saca lo mehor for di e globalisacion y controla y reduci mas tanto posible e efectonan di globalisacion ariba nos sociedad. Nos pueblo a demonstra durante e ultimo 3 decadanan di e siglo pasa di por saca e mihor for di desaroyonan mundial. No tin duda cu e decadanan nos dilanti nos lo saca lo mihor tambe di globalisacion, trahando responsable, dedica y sirbiendo e unico interes, cu ta esun di nos pueblo. Den e luz di e acontecimentonan y e pensamentonan aki, Movimiento Electoral di Pueblo, e partido cu desde su fundacion 34 aña pasa ta biba cu pueblo, ta traha y presenta su programa di Partido pa e proximo periodo di gobernacion. Nos programa di Partido, den lineanan grandi ta continuacion di e programa cu nos Partido a bin ta realisando, mediante Gabinete Oduber III.

Na 2001, na momento cu partido MEP, cu mandato absoluto a asumi gobernacion, nos a duna inicio na implementacion di nos programa 'Ordo y Prosperidad'. Cu e programa aki, nos a pone un base ariba e diferente areanan di gobernacion. Basicamente e trabou durante 2001-2005, tabata uno di organizacion cu e meta pa trece ordo atrobe den gobernacion. Na mes momento, e programa a keda influencia pa sucedidonan fuera di alcance di gobernacion, manera e atentadonan terorista di 9-11 cu a afecta nos sector turistico inmensamente hopi y a afecta e sector di aviacion mundial. E invasion di Afganistan y Irak, tabata otro sucedido cu ta afectando mundo den su totalidad. Y e acontecimentonan aki tambe a trece pa nos responsabilidnan extra cu anteriormente no tabata tin, manera seguridad ariba tur nivel y den tur sector. Tambe efectonan den cambio di clima rond mundo, unda periodonan di horcan den Caribe a muestra na varios ocasion su efectonan riba nos infraestructura.

E base cu 'Ordo y Prosperidad' a pone ta permiti nos continua cu e siguiente fase den nos accionnan, den nos esfuersonan pa realisa nos mision como Partido, esta creacion di un sociedad husto, democratico y solidario den un desaroyo sostenible, caminda e ser humano ta central, garantizando su seguridad, su libertad, oportunidad, bienestar y tranquilidad. Proteccion di nos pueblo y su propiedad ta un prioridad.

Cu e base poni, Movimiento Electoral di Pueblo ta percura pa entre 2006-2009 Aruba sigui progresa. Un progreso pa cual cada un di nos lo traha, segun capacidad y potencial, y asina duna nos contribucion pa su realizacion. Un progreso cu lo keda refleha den mihor calidad di bida pa nos hendenan. Un progreso cu lo keda refleha den mihor entrada pa nos trahadornan. Un progreso cu lo keda refleha den un solidarismo mas fuerte pa cu esnan debil den nos comunidad. Un progreso cu lo fortifica nos sistema di seguridad social. Cu un palabra, un progreso na sirbishi di nos comunidad. Esaki ta e compromiso cu Movimiento Electoral di Pueblo ta sera cu pueblo di Aruba. Cu seriedad, responsabilidad y den continuo contacto cu pueblo, Movimiento Electoral di Pueblo lo continua trahando pa Aruba sigui progresa.

MANEHO GENERAL

Telecomunicacion

Riba tereno di Telecomunicacion, mirando e competencia, mester bin cu un 'regulatory board' cu ta controla tarifa, calidad di servicio, calidad di e producto y e cumplimiento cu nos leyman y logicamente controla si tin competencia inhusto.

Gremionan social, medionan di comunicacion mester coopera pa stop cu ofende, difama, calumnia y instiga contra otro den tur profesion.

Mester bin un balansa den e podernan den nos pais, unda ningun hende por bisa y scirbi algo di un persona sin e tin e derecho di replica. No por abusa di e libertad di prensa, sin proteha e libertad di expresion di un y tur.

Empleadonan Publico

Lo bin cu un departamento cu lo encarga su mes cu productividad, eficiencia y balotacion di trabou di nos empleadonan publico. E departamento mester encarga su mes cu e calidad di servicio cu pueblo tin derecho ariba dje. Ningun hende por ta sin mas non-actief sin motibo. Productividad mester bira un di e elementonan pa promocion a base di nivel di trabou.

Lo start e proceso di transparencia, democratisacion, mihor control y harmonisacion di salarionan di e N.V.-nan y stichtingnan di gobierno en comparacion cu e salario di empleadonan publico.

Norma y balornan

Lo amplia e campaña di motivacion na cas y na scol di nos balornan spiritual, manera normanan di respet, fatsoen, moralidad y decencia.

Lo promove mas e union familiar y e balornan di ta pertenece na un familia. Ningun gobierno lo ta exitoso den su afan pa resolve problemanan, si nos cada un no ta acepta nos sentido comun di responsabilidad y di tin mas comprension pa otro.

Nos mester bira ehempelnan positivo pa nos yiunan y e futuro generacion, unda nan por sigui nos cu atencion, mescos mas lidernan di diferente gremio den nos comunidad mester carga berdadero responsabilidad pa trece solucion pa nos problemanan.

Companionan estatal

E inversionnan di e planta di awa W.E.B. NV durante e periodo 2005-2010 lo suma na un total di 246.8 miyon florin.

E inversionnan di e planta di electricidad Elmar NV durante e periodo di 2005-2009 lo ta 76.5 miyon florin.

Gobierno di MEP ta sostene tur e inversionnan misionario aki ya cu nan lo percura pa mantene e suministro di awa y coriente den forma continuo y optimal na nos comunidad.

E inversionnan aki ta necesario pa garantiza un crecimiento economico p'asina nos pais por sigui prospera.

MANEHO FINANCIERO-ECONOMICO

Meta: *Un economia solido cu ta crece a base di actividadnan economico di nivel halto, cu ta provee nos trahadornan cu empleo di calidad y ta contribui na mantene un bon sistema di seguridad social.*

Ideologia

Movimiento Electoral di Pueblo (MEP) su progama financiero-economico di Gobernacion durante di 2006-2010 ta basa riba principionan di ideologica social democrata, locual kier meen cu MEP ta sali for di e punto di bista sagrado cu tur ser humano ta igual y cu nan tur tin mesun derecho riba un bida decente awor y den futuro, pa nan mes y pa e siguiente generacionnan. Pesey MEP semper a traha duro y lo sigui traha incansablemente den interes general di Aruba pa asina mehora situacion financiero-economico di e pais y sigura un comunidad sano basa ariba igualdad y felicidad.

Desaroyo socio-economico sostenibel

Den vision di MEP, pues e ser humano semper ta para central y como tal MEP su obhetivo principal ta pa establece un equilibrio financiero-economico pa medio di un desaroyo solido, balansa y sostenibel. Aumento di nos producto domestico nunca lo ta un meta riba su mes, pero semper lo ta subalterno na bienestar social y felicidad general di nos pueblo, cu debido atencion pa nos medio ambiente. Pa Aruba esaki ta nifica cu crecemento economico lo wordo realisa, sin cu nos poblacion lo aumenta cu cantidadnan irresponsabel y cu suficiente espacio fisico pa nos futuro generacionnan.

Pa prome biaha desde turismo a bira un actividad economico di importancia maximo pa nos pais, MEP su Gobierno a logra, despues di negocia fuertemente cu y a la fin haña aprobacion di OESO (Organisacion pa Cooperacion y Desaroyo Economico) y Union Europeo, di pone un fundeshi firme pa diversificacion di nos economia den direccion di un sector financiero internacional. A introduci leyman fiscal nobo y MEP lo sigui traha pa fortifica e infraestructura necesario pa e sector aki por bai genera entradanan di importancia pa nos economia. Meta di MEP ta pa engrandece e sector aki, no solamente pa genera entradanan necesario pa caha di Gobierno, pero tambe pa crea un fuente di labor specialisa di halta nivel internacional. Logicamente e instrumento aki lo trece mas fluho di capital.

Mientras tanto turismo lo keda haña e sosten necesario pa sigui crece y keda nos pilar economico di mas importante. Aumento di e cantidad di cambenan di hotel lo tuma lugar na un manera selectivo y unicamente si esakinan lo contribui na un mehoracion di e calidad di nos producto turistico. Turismo crucero tambe lo sigui wordo stimula, como a resulta cu esaki ta contribuyendo pa un parti importante n'e bentanan den nos centronan comercial. Nos mester bay den calidad y no cantidad.

E sector petrolero, bou di guia di MEP, dia pa dia lo haña mas importancia pa nos economia y lo trece un diversificacion sano y stabil den nos estructura di empleo. MEP lo percura pa e refineria sigui inverti substancialmente den economia di nos pais pa asina crea mas cupo di trabou pa labor specialisa y contribui na aumento di nos entradanan local.

Tambe durante e proximo gobernacion di MEP lo duna inicio na e proceso pa bora gas, mediante nos compania Arubiano di Gas.

Pa contene e gastonan di bida pa e grupo di menos recurso den nos comunidad riba un nivel rasonabel, lo expande e control di prijs di productonan di promer necesidad y otro productonan importante mas ainda y lo stimula comercio local pa importa mercancia cu ta costa menos, pero sin afecta calidad di e producto.

Tambe MEP lo considera di bin cu un ley cu mester stimula competencia y cu lo duna Gobierno autorizacion pa interveni ora ta wordo sospecha cu companianan ta co-operando cu otro pa tene prijsnan intencionalmente halto. Teniendo cuenta cu e desaroyo internacional di prijs di energia, Gobierno di MEP lo studia e posibilidad pa minimalisa e impacto di esaki riba nos costo interno y nos desaroyo economico.

Tur esfuerzo lo wordo haci pa disminui e diferencianan den entradanan di nos ciudadanonan. Lo percursa pa e instrumentonan legal pa crea e posibilidad pa bin cu un fondo di pensioen general pa trahadornan den nos pais, banda di esun di viejez.

Instrumentonan cu lo wordo usa pa influencia e diferencianan aki den sentido positivo, lo ta creacion y mantencion di empleo di calidad, importa menos empleo cu ta posibel di pafor di Aruba, atencion primordial pa un desaroyo continuo pa medio di educacion continuo, inversion den infraestructura y facilidadnan educativo y riba tereno di salubridad publico, modernizacion di e capacidad productivo y aumento di productividad, restructuracion di nos sistema di impuesto den un sistema mas husto y un cu ta stimula inversion y productividad.

Union Europeo

Den nos relacion cu Union Europeo, MEP lo sigui boga pa mantene nos posicion di LGO, pa asina garantiza nos Status Aparte den futuro y duna Aruba mas espacio di maneho socio-economico y financiero pa dirigi su mes futuro sin cu mester contribui substancialmente na caha di Europa y cu mantencion di nos propio moneda y Banco Central.

Integracion den Europa lo nifica fin di nos posicion autonomo den Reino y lo crea un competencia grandi cu nos partner comercial grandi, esta Merca.

Co-operacion comercial regional

MEP lo studia e posibilidadnan pa mas co-operacion comercial regional den Caribe y cu Latino America pa asina amplia nos base pa exportacion. Den e cuadro aki nos status di LGO por hunga un rol di importancia. Gobierno di MEP lo negocia mas oportunidad pa exportacion pa Mercado Europeo.

Maneho di inversion

MEP lo sigui planea su inversionnan publico a base di un Plan Nacional di Inversion, caminda cuenta ta wordo teni cu desaroyonan den nos sector priva y caminda cu Gobierno ta complementa cu inversionnan publico teniendo cuenta cu inversionnan priva y demas necesidadnan di nos pueblo. Solamente un programa di inversion tan balansa y transparente por conduci na un desaroyo equilibra y responsabel y na bienestar di nos pais. Inversion publico lo ta masha varia pa percursa cu henter comunidad lo disfruta di un desaroyo general. Lo sigui inverti den enseñanza, salubridad publico, vivienda social, careteranan etc.

Den cuadro di co-operacion pa desaroyo cu Hulanda, Gobierno di MEP lo guia negociacionnan cu Hulanda den e proceso di evaluacion di e sistema pa financia proyectonan pa medio di Fondo di Desaroyo pa Aruba (FDA). MEP lo sigui negocia pa termina e debenan na Hulanda cualnan a origina den pasado pa asina Aruba por a

financia su desaroyo. MEP lo percura pa Aruba ta financieramente fuerte para ora cu Hulanda lo termina su ayudo financiero na 2009. MEP lo garantisa cu FDA lo sigui existi pa asina sostene nos inversionnan publico. Gobierno di un pais ta trendsetter di su economia, unda cu su inversionnan e ta indica e progreso den un pais.

Finanzas publico

MEP lo percura pa un presupuesto transparente y responsabel pa asina contribui na un economia ordena. Lo contene e gastonan coriente y inverti den proyectonan publico cu ta sostene nos desaroyo socio-economico. Gobierno di MEP lo percura pa tur debe na comerciantenan local y otronan lo wordo paga na tempo. MEP lo considera pa restructura e situacion financiero di tal forma cu su entradanan y gastonan lo ta mas balansa. Den e cuadro aki nos sistema di impuesto lo wordo revisa y lo bira mas husto, den sentido cu nos tarifanan riba entrada lo baha y lo considera di introduci un impuesto riba valor agrega.

Den un forma husto lo busca e “fair share” riba cual gobierno y pueblo tin derecho riba dje, conforme nos leynan existente di belasting. Nos ya a yega 19% di nos GDP na entradanan di belasting.

Pa disminui e peso financiero di e gastonan pa salubridad publico riba presupuesto di Gobierno, AZV lo haña mas autonomia financiero, di tal forma cu e instancia aki lo mester percura pa su entradanan lo ta suficiente halto pa cubri su gastonan. Gobierno lo controla e instancia aki di distancia, den sentido di calidad di su servicio. Pueblo no por paga pa desgaste di remedi, mal uzo y ineficiencia.

Debenan publico

MEP lo sigui consolida e debenan halto cu, manera ta conoci, a wordo hereda for di Gobernacion anterior y cu a pone y ainda ta pone un peso incargabel riba presupuesto di Gobierno. E confiansa cu nos a crea, e estabilidad financiero a yuda nos pa refinancia na juni 2005, 168 miyon florin di debe cu nos a hereda.

Lo refinancia e debenan di gobierno y di companianan di gobierno pa alivia e pesonan y p’asina nos por goberna cu mas tranquilidad y seguridad, cumpli cu nos obligacionnan y sigui inverti den nos pais.

Tambe MEP lo continua di caba cu tur e garantianan cu el a hereda for di pasado y cualnan ta e fuente principal di e nivel di debenan di Gobierno. A pesar di e problemanan financiero grandi aki cualnan ta di largo duracion, MEP lo sa di crea suficiente espacio pa sigui inverti den economia di nos pais. Imagina si MEP por a goberna sin mester a paga e debenan hereda, lo nos por a haci mucho mas pa nos pais.

Companionan estatal

MEP lo introduci mas reglamentacion pa su companianan di Gobierno. E companianan aki mester funciona mas cu awor na interes y bienestar di nos pueblo. MEP lo percura cu via di structuranan formal e companianan aki lo cumpli cu reglanan di bon maneho (corporate governance).

Gobierno como doño di e companianan estatal mester ta un refleho di e maneho di gobierno como doño. E salarionan den e NV-nan mester ser sincronisa cu esnan di gobierno.

Balansa di pago

MEP lo percura pa nos reserva di divisa lo mantene su mes riba un nivel responsabel pa asina fortifica e balor di nos moneda y pa sigura cu nos economia por paga p’e

importacionnan di bienes y servicionan necesario. Aki turismo, como e generador mas grandi di divisas pa nos economia ta hunga un rol masha importante.

Inflacion

E maneho monetario lo ta dirgi riba combatimiento di inflacion, pa asina leu cu esaki no ta wordo importa pa medio di compranan den exterior. Mirando cu nos ta acopla na e dollar Mericano, nos mester vigila esaki di acerca pa nos keda competitivo.

MANEHO DI TURISMO Y TRANSPORTE

Gobierno di MEP ta sigui boga pa ‘good governance’. Den cuadro di esaki Gobierno di MEP lo continua cu su maneho transparente y lo sigui involvi e comunidad Arubano. Lo sigui brinda servicio den e diferente sectornan turistico, a base di eficiencia, efectividad, confianza, pago y seguridad pa logra un desaroyo social, economico y financiero pa e comunidad Arubano.

Turismo:

Turismo ta e sector mas creciente y esun mas importante pa cu e desaroyo economico y financiero di Aruba. Obhetivo di desaroyo di Turismo ta na bienestar y na e calidad di bida di e comunidad di Aruba.

Maneho pa Turismo

- Gobierno di MEP lo realisa y ehecuta e “corridor turistico” cu mester wordo construi di aeropuerto pa e zona hotelero;
- Lo realisa y ehecuta e Plan Sasaki pariba di brug, mediante construccion di dos hotel di clase halto hunto cu un golfcourse na Seroe Colorado;
- Aruba Tourism Authority (ATA) lo bira un empresa (bedrijf) cu su propio presupuesto y Raad van Bestuur, unda gobierno, AHATA y otronan mester ta representa;
- Lo converti e fondonan pa cu mercadeo di turismo den un maneho financiero independiente;
- Lo evalua e oficianan di turismo y e personal den exterior ariba nan efectividad, unda a base di e necesidad mester acentua e lugarnan cu ta promove Aruba;
- Continua na organisa encuentronan di trabou pa aeroliñeanan, agencianan di viahe, touoperatornan y otro partnernan den e industria turistico pa garantiza aumento di e fluho di turistanan pa Aruba;
- Proteccion y mantencion di e atraccionnan turistico principal di Aruba y “upgrade” e calidad di e producto Aruba;
- Lo eleva e producto turistico cu hotelnan di mihor calidad, haci nos industria turistico mas eficiente y productivo;
- Lo mehora e producto turistico cu un hotel Ritz Carlton di 5 strea, sin garantia ni tax holiday;
- Continua cu e programa nacional di informacion, promocion, movilidad y capacidad di destinacionnan pa mantene y/of aumenta e cantidad di turista pa Aruba pero mas aun aumenta e calidad di turista pa Aruba;
- Diversifica y promove mercadonan nobo y potencial pa Aruba;
- Introduci programanan di concientisacion pa tanto e comunidad y scolnan di Aruba como pa tur trahador den e sector turistico cu e tema “Con importante Turismo ta pa Aruba”;
- Promove mas vuelonan di charter pa Aruba den combinacion cu eventonan special organisa na Aruba;

- Introduci y organisa “airline marketing” pa Aruba ;
- Introduci, organisa y promove e turismo di deporte aquatico pa Aruba cu ta encera tambe un regla zonal pa e turista cu ta bini specialmente pa duik y pa pisca;
- Diversifica y continua cu e programanan di organisa y promove eventonan grandi y special na Aruba cu ta atrae hopi turista, manera entre otro festivalnan musical, torneonan di golf, shownan di moda, conferencianan grandi etc.;
- Completa e automatizacion y funcion optimal di Aruba’s Database pa resultadonan mas efectivo y al instante;
- Introduci y desaroya e mercadeo di database, e-mail, broadband;
- Amplia Aruba su webpage (aruba.com) cu mas promocion y mercadeo pa Aruba y yega na promove aruba.com na chines y hapones;
- Promove y organisa pa tin mas vuelonan interinsular entre Aruba, Antiyas Hulandes y Islanan Ariba;
- Pa Aruba tin su propio aerolinea nacional, pero cu participacion di sector priva.

Servicio di Aviacion

- Hisa e Calidad di nos Servicio di Aviacion pa Aruba wordo reconoci internacionalmente cu mas acuerdonan y comunicacionnan aereo;
- Continua cu e politica liberal ariba tereno di aviacion, trece mas airlift y trata na trece mas turista Europeo y Latino Americano pa diversifica nos turismo. Logicamente e mercado Mericano ta keda esun mas importante y lo trata di haña mas vuelo for di e mercado aki;
- Completa e automatizacion di e administracion y inicia un centro di informacion pa Departamento di Aviacion cu colaboracion di Servicio di Meteo;
- Continua cu e proyecto pa Aruba haña su propio y independiente Servicio di Meteo;
- Ampliacion y renobacion di e pista di aterizaje di Aeropuerto Reina Beatrix;
- Ehecuta masterplan di nos Aeropuerto pa asina Aeropuerto bira un hub di cargo y pasahero den futuro;
- E construccion di un F.B.O. (Fixed Base Operation) lo bira un realidad;
- Airport mester bira tambe un “City-Airport”;
- Completa e proyecto di Radar pa mehoracion di tele-comunicacion.

Trafico Maritimo

- Completa y realisa e proyecto di converti “Aruba Ports Authority” den un “Caribbean Top Seaport”;
- Desaroya e Puerto di Aruba den un di e mihor puertonan crucero den mundo;

- Converte y desaroya e Puerto di Aruba den un Hub special pa Cargo entre Latino – y Norte America;
- Crea un economia nobo cu e mudamento di e haf industrial di Oranjestad pa Barcadera. Haf di Playa lo bira uno pa barconan crucero y lo crea facilidadnan pa un Jachthaven hunto cu otro facilidadnan turistico y comercial;
- Lo haci nos Zona Franca un vitrina pa productonan Brasileño, di China, India y otro paisnan, unda nos mester bira centro comercial internacional;
- Realisa e proyecto di construccion di un Terminal nobo pa Container;
- Desaroya Puerto di Aruba den un “Home-Port” terminal.

Transporte Publico

- Completa y realisa e Stacion di Bus pa San Nicolas;
- Sigui desaroya y embeyece e Stacion di Bus na Oranjestad;
- Compra di mas bus p’asina optimalisa transporte publico;
- Instala rutanan nobo pa e comunidad;
- Introduccion y mehoracion di e “standards” pa chauffeurnan di taxi.

MANEHO SOCIAL

Meta:

Creacion di un sistema social cu ta duna sosten na miembronan di nos comunidad cu pa un motibo of otro ta den un situacion socialmente dificil.

Den e proximo gobernacion di MEP lo enfoca pa hisa calidad di bida di tur hende cu ta biba na Aruba especialmente por medio di proyectonan dirigi riba esnan mas vulnerabel, manera:

- **Nos muchanan** – un enfoque pa salvaguardia seguridad y bienestar di nos muchanan, manera introduccion di ley di centro di cuidado di mucha;
- **Nos hobennan** - programanan di guia mas adapta na e necesidad di nos hobennan, manera programa pa hobennan cu problema di conducta por medio di un centro orthopedagogico;
- **Famianan den situacionnan dificil** – un enfoque social pa duna e sosten necesario pa un mihor funcionamiento di nos famianan den comunidad;
- **Hende muher den situacion vulnerabel y di desigualdad** – nos kier logra pa hende muhernan por tin un mihor situacion, por progresa y por sostene nan mes y nan famianan mihor;
- **Ancianonan** – programanan pa esnan mas grandi por haña un bon cuidado y por goza di proceso di embehicimento mas activo manera renobacion di St. Michael Paviljoen y construccion di centro di cuidado pa anciano na San Nicolas;
- **Esnan ariba bijstand** – e enfoque ta pa nan por tin un mihor participacion den comunidad.

Accionnan den campo social

- Fortifica e trabou di e teamnan social den bario, percurando pa nan yega liher na esnan cu tin necesidad na ayudo social;
- Fortifica e contacto entre e teamnan social y organisacionnan den e bario, manera iglesia, schoolnan y Wit Gele Kruis, cu e meta pa preveni y atende problemanan social mas efectivo;
- Continua cu e re-socialisacion laboral di esnan ariba lista di bijstand cu ta den condicion pa traha, a base di e concepto di ‘pathways to independence’;
- Stimula, mediante e trahadornan comunitario den e teamnan di bario den cooperacion cu Centronan di Bario, actividadnan den barionan cu e meta pa aumenta e cohesion social;
- Continua duna atencion, sosten y ayudo special y profesional na gruponan specifico den nos comunidad cu ta pasa den situacionnan dificil, manera muchanan, hobennan y hende muhernan;
- Stimula nos hubentud desaroya su potencialnan organisatorio y di liderasgo.

MANEHO DI SALUBRIDAD PUBLICO

Meta

Preveni enfermedad, promove formanan di biba saludable y percura pa un cuida medico adecuado y di nivel .

SVB

Gobierno di MEP lo sigui pone atencion special pa fortifica SVB y unda ta necesario mehora e beneficianan cu ta wordo ofreci. E mehoracionnan entre otro ta dirigi pa kita algun discriminacion existente, mehora e beneficianan y unda ta posibel hisa e uitkering cu ta wordo paga.

San Nicolas lo haña un edificio di SVB nobo y moderno. Esaki siguramente lo ta un mehoracion grandi pa e trahadornan di SVB mes.

Fuera di e edificio nobo na San Nicolas, e oficinanan principal di SVB cu awor ta reparti na 4 diferente localidad na Oranjestad, lo mester wordo consolida den un edificio moderno, pa sigui garantiza un SVB moderno, profesional y eficiente, no solamente pa su clientenan pero tambe pa su personal.

Pa sigura cu e control medico cu ta wordo duna na SVB ta cumpli cu normanan internacional y por amplia e beneficianan cu ta ofrece e trahador y e doño di trabou lo yega na un cooperacion estrecho entre SVB, Universidad di Amsterdam y NSPOH pa duna curso di estudio pa especialista medico den ramo di control medico na Aruba mes. Mientras ta termina e curso di estudio aki lo por cuminsa ofrece un servicio di prevencion di malesa y accidente na pia di trabou y amplia e control pa cubri tambe e personal cu ta cay riba e limite di salario actual, esta 49296 florin pa aña.

Accionnan den Salubridad Publico:

- Continua cu campañanan di informacion y concientizacion ariba diferente malesanan y con pa preveni di contagia cu nan;
- Fortifica e campañanan di concientizacion ariba e efecto di nutricion ariba nos salud, poniendo enfasis ariba nos hobennan y nos hende grandinan;
- Fondo di pensioen di viejez. Debi na e desaroyo di nos pais, unda nos a crece for di 60 mil pa mas cu 100 mil habitante, nos fondo mester atencion debido, unda nos mester den un combinacion di edad, prima y individualisacion garantiza pueblo su pensioen. E asunto aki ta di interes nacional y no por laga espacio pa politica partidista;
- Seguro General Medico (AZV). Nos a trata 3 aña largo pa haña e cooperacion necesario pa baha e gastonan excesivo, pero no tabatin e boluntad di esnan den e mundo medico.

Nos ta compromete nos mes pa definitivamente trece e claridad necesario, mediante un mihor reparticion di e responsabilidad y contribucion financiero di tur esnan involvi. A.Z.V. manera cu e ta no por sigui asina.

MANEHO DI ENSEÑANSA

Tanto nos constitucion como tratadonan cu institucionnan manera Nacionnan Uni ta bisa bon cla cu cada mucha biba na Aruba tin e derecho sagrado riba educacion pa garantisa su desaroyo optimal.

Sin embargo awendia mester haci mucho mas empeño den e sentido cu mester haci enseñansa mas atractivo pa nos hubentud keda interesa den siñamento.

Mester re-anima e atencion y interes di nos hubentud specialmente na nos enseñansa despues di primaria. Mester keda pone atencion na nos maneho di inovacion continuo den tur nos tiponan di enseñansa.

Enseñansa mester ser dirigi riba e necesidad di su pueblo. Gobierno di MEP lo bin cu programanan pa stimula nos muchanan pa sigui studia y motiva nan pa bin cu bon resultado.

Puntonan di atencion extra ta:

- ICT
- Enseñansa Primario
- Inovacion di Enseñansa Secundario Avansa
- Inovacion Educacion Profesional Basico
- Inovacion Educacion Profesional Intermedio
- Enseñansa Superior
- Educacion pa Adulto

ICT

Ya caba Educacion Profesional Basico y Intermedio y Enseñansa Secundario General ta dispone di tanto localidad como material pa ICT; enseñansa primario no ta asina leu ainda. Mester haci esaki tan pronto cu ta posibel y a la vez introduci integralmente un maneho pa enseñansa cu sosten di computer (computerondersteunend onderwijs).

Enseñansa Primario

Mester sigui pone atencion riba desaroyo di scol, curiculo, acercamento pedagogico nobo y introduccion di Papiamento. Inovacion mester dreña klas despues cu tur actor ser prepara debidamente den e habilidadnan nobo. Tambe material nobo mester wordo desaroya mas rapido. E maestronan ta siguiendo cursonan di recapitacion.

Inovacion di Enseñansa Secundario Avansa

Despues cu ciclo basico a inicia na 2004 den sentido cu den e prome klasnan di Mavo, Havo y Vwo un curiculo nobo a wordo presenta, awor ta den e segundo klasnan esaki lo ta e caso. E structura necesario pa implementa inovacion y guia e inovacion ya ta prepara pa sigui concentra riba e calidad di e inovacion.

Inovacion di Educacion Profesional Basico

Pa mantene local a inova caba den nos Educacion Profesional Basico, lo sigui pone atencion riba e aspecto di calidad, mientras cu e proceso di inovacion ta uno continuo cu ampliacion di e programanan ofreci y mehoracion di e sistema di guia y cuido di alumno. Tambe mester sigui cu e trayecto di crea un sistema di enseñansa special secundario.

Inovacion di Educacion Profesional Intermedio

Fuera di e ultimo parti di restructuracion cu ta consisti di inovacion di curiculo y construccion/renobacion/adaptacion di e parti fisico, tin mester mas atencion pa:

- ICT
- Cumpli cu nos sector laboral cu ta pidi pa cursonan specifico riba nivel profesional intermedio;
- Realisa mihor acoplacion na Educacion Profesional Basico;
- Rebiba Consejo di Educacion y Labor Aruba (CELA);
- Revision continuo di e programanan ofreci, teniendo cuenta cu tecnologia moderno.

Enseñansa Superior

Ta preparando un nota di maneho tocante e topico aki, mirando e porcentahe abou di nos ciudadanonan cu tin diploma di enseñansa avansa compara cu esnan di otro paisnan. Mester ofrece facilidadnan local pa estudionan riba nivel di enseñansa superior y a la vez crea condicionnan pa haci mas uso di “distance learning”: Recientemente a pone un fundeshi firme pa un facultad nobo na nos Universidad, esta e facultad di “Hospitality & Tourism Management”. Tambe lo enfoca riba introduccion di mas facultad dentro di nos universidad.

Educacion pa Adulto

Tur facilidad mester wordo crea pa nos ciudadanonan por hisa nan nivel di educacion. Fuera di enseñansa general, mester tene cuenta cu sector priva tin cierto exigencianan cu un trahador mester cumpli cune pa asina e por eherce su funcion debidamente. Pronto Aruba por conta cu diferente facilidad caminda tur adulto tin oportunidad pa sigui un estudio segun su interes.

Lo haci uso di facilidadnan y experticio di Instituto Pedagogico Arubano, Universidad di Aruba y di Biblioteca Nacional den nos empeñonan pa optimalisa nos enseñansa manera describi ariba.

MANEHO DI HUSTICIA

General

Gobierno di MEP lo tin atencion special pa e organisacion di Polis y DINA cu e meta pa promove mas aun e capacidad y integridad di nan funcionarionan, optimalisa e funcionamiento di e departamentonan di Husticia, optimalisa e motivacion di esnan cu ta traha den Husticia y cu al final e meta ta pa optimalisa e servicio cual nos comunidad tin derecho ariba.

Accionnan riba tereno di husticia:

- Mester bin un control mas severo di admision di persona den nos pais y tambe pa local ta trata trahadornan di exterior. Gobierno mester comparti responsabilidad cu esnan cu ta trece hendenan for di exterior;
- Mester kita e tareanan cu no necesariamente ta di polis y laga e polisnan haci e trabou di mantene orden publico y protega pueblo cu mas dedicacion. Esnan cu ta organisa actividadnan publico lo mester contribui na e gastonan di nos Cuerpo Policial;
- Integridad. Pa bo ta polis, douanero, cuidador di preso etc. bo mester ta un persona integro y pesey mester cuminsa na e gruponan aki y despues bay pa henter e cuerpo di empleado publico pa investiga casonan cu no ta bon pa nan imagen;
- Control na frontera mester ta exclusivamente un tarea di Aduana;
- Den un pais di apenas 194 km² a yega e momento pa declara guerra total na ilegalidad, droga, labamento di placa, hortamento na cas, negoshi, oficina di nos hendenan;
- Mester introduci un sistema preventivo cu lo tin su efectonan pa controla criminalidad y ilegalidad;
- Nos mester bay duna y pone mas atencion na e victima y bay na un sistema cu fuera di castigo di prison ta bin cu dañonan di perhuicio hopi halto cu mester paga na e victima of su familia;
- Lo crea dentro di Cuerpo Policial un seccion special cu den cooperacion estrecho cu e seccion Crimen Organisa lo percursa pa combati e benta local di droga, esta esnan cu ta bende droga riba caya, den nightclubnan, na scolnan, na hotelnan etc;
- Lo percursa pa introduci orarionan nobo pa cu seramento di localidadnan manera bar, restaurant y nightclubnan, tanto pa den siman como den fin di siman;
- Lo implementa e ley di detencion di hubentud ('jeugd detentierecht');
- Lo construi un edificio di Corte na Savaneta, dunando Savaneta asina un "boost up" economico;
- Mas proyecto di lus por ehempel, Piedra Plat, Simeon Antonio, Dakota, Paradera, Pos Chiquito y ampliacion di e barionan cu ya a a haña caba pero cu falta ainda;
- Construcion di un edificio di Dienst Technische Inspectie (DTI) na Kibaima (skina Drive Inn); Un DTI completo unda e parti tecnico y e parti di keuring di auto ta bou un solo dak y kedando na un lugar central;
- Polis di bario den e barionan di Madiki, Noord y Jaburibari treciendo asina polis mas serca di comunidad;

- Lo introduci un Cuerpo Voluntario Arubano y tambe lo institui e departamento “Radar y 911”;
- Lo bin cu Servicio Nacional di Inteligencia cu tarea na estilo di Home Land Security”;
- Den cooperacion cu Universidad di Aruba lo organisa cursonan di recapitacion di e funcionarionan cu ta traha den Husticia;
- Lo promove mas vigilancia di nos costanan y di e entradanan na wafnan di Oranjestad, Barcadera y na e refineria Valero;
- Lo introduci e di tres radar pa e parti Noord di Aruba;
- Lo promove un maneho respectu di instalacion di camaranan di seguridad na sitionan publico;
- Lo re-introduci e maneho na unda prisioneronan lo contribui na comunidad, por ehempel por medio di ehecuta trabounan pafor di KIA.

MANEHO DI LABOR

Vision General

Lo introduci un proyecto di concientisacion nacional, incluso educacion y recapacitacion, pa loke ta trata nos mentalidad laboral, atitud y productividad; Alavez lo reuni tur experto riba e diferente terenonan aki den un cumbre pa presenta un plan strategico nacional pa con, nos tur hunto kier pa e pais aki desaroya riba tur sector riba un base di 20 aña (termino largo).

Accionnan den campo laboral:

- Lo pasa un ley cu tur sector laboral, trahadornan ta haña 1 diadomingo di cada 4 obligatoriamente liber, dunando e empleadonan mas tempo cu su famia;
- Sigui amplia y mehora Jobfair y Jobcenter pa pone ainda mas residente local na trabou;
- Sigui conscientisa y educa trahadornan di nan derecho, p.e reglanan di overtime, dianan oficial liber etc.;
- Introduccion di leyman nobo contra abuso di trahador;
- Implementa modernisacion di mecanismo di control eficiente pa preveni abuso contra trahadornan;
- Caba cu e proceso pa modernisa leyman laboral:
Reduci orario di trabou gradualmente for di 46 ora te 40 ora pa siman;
Amplia e orario di inspeccion laboral pa reduci abuso contra trahador;
Ley pa firma pa permiso di trabou mara na Jobcenter y cifra di labor;
Ley pa responsabilisa subcontratistanan;
Ley pa responsabilisa doñonan di trabou na momento di benta of traspaso pa proteha interes di trahador;
Ley pa elimina Call Dealers.
- Pa controla mihor e mercado laboral lo introduci un permiso di trabou banda di admision, unda lo keda publica constantemente e profesion cu nos mes no tin hende pa cu e trabou. Esaki logicamente ta encera cu si bo a haña admision no necesariamente bo a haña permiso pa trabou;
- Lo start un campaña pa stimula tur esnan cu por ainda pa bay den e mercado laboral;
- E empresa cu no entrega un manpowerplanning lo no por haña permiso pa trabou.

MANEHO DI DEPORTE

Deporte mester bira e medio pa un mihor salud pa nos pueblo, unda cu practicando esaki lo trece un mihor disciplina. E lo yuda nos tambe combati criminalidad.

Nos mester stimula e mentalidad positivo den deporte, di e reto pa gana, competi sanamente, participa activamente y duna un resultado pa trata na surpasa bo mes prestacion cada vez mas.

Ser un deportista mester haci bo orguyoso di por ta un atleta cu ta destaca na tur momento.

Accionnan riba tereno di deporte:

- Traha varios lugar pa cana y haci ehercicio, manera p.e. di Aeropuerto bay te rotonde y den vecindario di Hooiberg;
- Creacion di un sistema estructura pa produci “topatleta”;
- Beca (beurs) na deportistanan local cu riba nivel individual por alcanza e nivel di mas halto;
- Formacion di lidernan deportivo, entrenadornan deportivo y fisico di calidad halto y hendenan cu por maneha e centronan di deporte na un manera cu nan por duna e mas halto rendimiento;
- Lanta gruponan di trabou pa mantencion di tur tereno y facilidadnan deportivo a base di programa nacional;
- Amplia e competencianan di deporte escolar;
- Ofrece tur scol basico e posibilidad pa alumnonan haña entrenamiento deportivo y fisico di mas halto nivel;
- Construi mas proyecto multifuncional den cooperacion cu scolnan, na unda e facilidad durante dia ta pa scol y atardi pa deporte di comunidad. Un fundacion independiente lo maneha y mantene e facilidadnan aki;
- Noord: Compleho multifuncional na Westpunt, Sporthotel na Centro Deportivo Frans Figaroa, Embeyecimento di Noord y vecindario;
Simeon Antonio: Tereno pa Little League, Consultorio Medico;
San Nicolas: Renobacion di Joe Laveist Ballpark, Instalacion di veld di atletismo y Parke Recreacional haciendo uzo di paisahenan natural di e area (e.o. Grapefield te Rincon);
Pos Chikito: Ball park pa Little League;
Santa Cruz: Piscina special, Museo Libertador Betico Croes, Buki historico di bida di Betico y parke recreativo.

MANEHO CULTURAL

Mirando e progreso economico y e fluho grandi di no-localnan den nos comunidad ta mas cu obvio cu e proceso di integracion ta importante, pa stimula, promove nos cultura, folklore y identidad bou di henter e pueblo. Tur cu ta biba riba e pida baranca aki mester adapta nan mes na nos custumbernan. Nos herencia cultural mester ser proteha y conserva.

Accionnan riba tereno di cultura:

- Implementa reorganizacion di henter e aparato di cultura cu un structura segun proponi den plan di maneho integral. Pa promer biaha un departamento encarga cu maneho cu tambe lo produci investigacion, documentacion, concientisacion y implementacion di trabounan riba e tereno aki;
- Sigui engrandece nos cultura a base di e Plan Integral pa maneho di Cultura di Aruba;
- Ehecuta programanan recomenda for di e maneho cu a inclui input di publico for di e Cumbre 2002 te na encuentronan di 2005;
- Crea mas posibilidad di fondonan financiero pa nos mundo cultural basa riba e plan di maneho integral;
- Lo introduci un beca pa studia den ramo di cultura;
- Lo construi na Piedra Plat: Parke interactivo “Cunucu di Cultura”.

MANEHO INFRASTRUCTURAL

Un bon infraestructura ta un di e elementonan mas importante pa sigui desaroya un pais, unda cu Gobierno mes ta keda inverti constantemente den esaki.

Nos ta haciendo tur locual ta den nos alcance pa e retrazo cu nos a hereda den nos infraestructura ser elimina den e proximo periodo di gobernacion.

Accionnan riba tereno di Infraestructura:

- **Ordenacion teritorial** – Nos lo traha riba ehecucion y implementacion di e ley di ordenacion teritorial y formula un plan di desaroyo teritorial pa Aruba;
- **Vivienda** – Nos lo sigui cu e maneho pa construi casnan social pa diferente grupo den comunidad (gruponan di menos recurso, gruponan cu limitacion fisico of mental, nos grandinan etc.) y sigui ofrece ayudo financiero pa compra y construccion di cas propio (bouw- en koopbijdrage);
- **Fondo di caretera** – Nos lo amplia e trabounan di renovacion y mantencion di nos careteranan den cuadro di Fondo di Caretera y di DOW. Nos lo ehecuta e proyectonan di e caretera nobo di Cumana pa Eagle y di Pos Chikito pa San Nicolas;
- **Maneho di tereno** – Nos lo sigui cu e maneho nobo, husto y transparente y pro-activo pa otorgamento di tereno p’asina sigui alivia e situacion di vivienda y cu cada famia por yega na su propio cas;
- **Edificionan di Gobierno** – Nos lo sigui cu e maneho pa construi edificionan propio di Gobierno p’asina baha e gastonan di huur y mehora e servicio pa publico;
- **Plan di awa di yobida** – Nos lo sigui ehecuta e proyectonan di desague di awa caminda lo alivia e barionan cu ta sufri di e problema di inundacion;
- **Plan di embeyecimento** – Lo amplia e plan di embeyecimento di Oranjestad pa otro barionan y alavez crea mas facilidad den barionan p’asina hisa calidad di bida den tur bario.

MEDIO AMBIENTE

E desaroyo economico y progreso di nos pais a bay asina acelera cu e presion ta grandi riba nos medio ambiente.

Apesar di esaki nos ta compromete nos mes na haci tur locual ta na nos alcance pa cuida esaki optimalmente cu e instrumentonan legal cu nos tin.

Nos tur tin e obligacion aki pa cu e generacion aki y esun despues di nos.

Accionnan riba tereno di Medio Ambiente:

- Lo continua cu e proyecto di modernizacion di procesamento di sushi na Parkietenbos (segundo fase di e proyecto);
- Lo introduci e principio di ‘esun cu ta susha mester paga’;
- Remplazo y modernizacion di e parke mobil (‘wagenpark’) di Serlimar;
- Lo construi un edificio nobo pa Serlimar;
- Lo introduci minicontainernan pa tur cas na Aruba;
- Lo soluciona e problema di cacho di caya.

EPILOGO

Partido MEP a presenta e programa aki “Hunto nos SI por mas pa bo”, sperando cu e puntonan di accion presenta den e programa aki lo haña debido atencion cerca un y tur den comunidad.

Na e momento aki nos pais ta pasando den un desaroyo economico sumamente positivo y ta deseo di nos tur pa esaki continua. Inversionnan na cantidad, tanto door di Gobierno como sector priva. Nos tin un bon partnership cu sector priva y sindicatonan en general.

Ta pesey partido MEP ta haci un apelacion fuerte na e pueblo votador pa dia 23 di september duna boso voto di confiansa na e unico partido cu ta traha den interes general di pueblo, esta partido Movimiento Electoral di Pueblo (MEP).

Cu MEP den gobernacion un y tur por mira unda tur nan placanan di belasting ta bay y cu Aruba berdaderamente ta prospera. MEP ta sinonimo na estabilidad politico y tranquilidad den nos pais. Nos pueblo no por depende di asientonan comercial pa negocia un gobierno.

Pues ban duna MEP un biaha mas e mandato pa asina e partido aki por sigui dirigi destino di e pais aki na beneficio y felicidad di nos yiunan y yiunan di nos yiunan.

Cu Dios Todopoderoso sigui bendiciona e pida baranca aki y ilumina nos tur pa uza nos inteligencia y habilidad na bienestar di nos pais.

Pa cualkier comentario y sugerencia, por tuma contacto libremente cu miembronan di Directiva y di Consejo di partido MEP.

Lider di Movimiento Electoral di Pueblo (MEP)

Nelson Orlando Oduber

Aruba, augustus 2005